

H. ELIAS, SDB

# Ki Mawlynnai

**bad  
KIWEI PAT  
KI JINGPULE**

DON BOSCO PUBLICATIONS - GUWAHATI - SHILLONG - TURA



**SCHOOL SECTION**

**H. ELIAS, S.D.B.**

# **KI MAWLYNNAI**

**bad Kiwei Pat  
Ki Jingpule**

**Na ka bynta ki Khyannah**


**Klas II**

1999

**DON BOSCO PUBLICATIONS - GUWAHATI - SHILLONG - TURA**

*Available at*

**DON BOSCO BOOK DEPOT - SHILLONG 793 003**



1985 :	Re-print	5,000	copies
1987 :	Re-print	10,000	copies
1990 :	Re-print	15,000	copies
1994 :	Re-print	20,000	copies
1999 :	Re-print	5,000	copies
	Re-print	10,000	copies

**Don Bosco Publications Catalogue Card No. K 99.095**

**LL 1080**

**Don Bosco Press**

**Don Bosco Technical School**

**Shillong - 793 003**

## KA JINGKDEW SLA

	Sla
1. Ka Pyrthei — Mariang ... ..	5
2. <b>Ka Jingduai</b> ... ..	8
3. Ki Mawlynnai (I) ... ..	9
4. Ki Mawlynnai (II) ... ..	12
5. <b>Ngi dei ban Kynmaw</b> ... ..	16
6. U Pandit Jawaharlal Nehru ... ..	17
7. Ka Ri jong ngi ... ..	20
8. <b>U Ngap</b> ... ..	23
9. U Ksew ha Sem - Masi ... ..	24
10. U Raja Birbol ... ..	26
11. Ka Telegrap ... ..	30
12. U Damon bad U Pithias (I) ... ..	33
13. U Damon bad U Pithias (II) ... ..	35
14. Ka Bainong jong ka jingkohnguh bad jong ka jinglamler ... ..	37
15. <b>Khublei Bnai</b> ... ..	41
16. Ka Peisa — Tyngka ... ..	42
17. <b>Ka Erlong</b> ... ..	44

18.	U Nongput — Tangmuri (I)	...	...	45
19.	U Nongput — Tangmuri (II)	...	...	48
20.	<b>Artylli ki Han</b>	...	...	50
21.	U Mahatma Gandhi	...	...	51
22.	Ki Shithi	...	...	54
23.	Ka Jingdon-akor	...	...	56
24.	U Nongrep	...	...	58
25.	<b>Kohnguh</b>	...	...	60
26.	Ka Jylla Assam	...	...	61
27.	U Slap	...	...	65
28.	<b>I Mei</b>	...	...	67
29.	U Nongthoh — dieng bad u Sdic	...	...	69
30.	<b>Ko Ri Baieid</b>	...	...	72

# 1. KA PYRTHEI-MARIANG

<b>ba-i-tyn-nat</b>	<b>met-bneng</b>	<b>sa-hit-bneng</b>
<b>pyn-suh-sieng</b>	<b>jing-iw-bih</b>	<b>lai-phew-jait</b>
<b>ba-sngew-thiang</b>		<b>um-poh-liew</b>
<b>ra-nab-lum</b>		<b>jing-i-phuh-i-phleng</b>

Ngi shong ha ka pyrthei ka **ba-itynnat**. Don sa kiwei pat ki **met-bneng kiba** marjan ia kane ka khyndew ba ngi shong ma-ngi. Ka sngi, u Bnai bad ki Khlur ki long ki sharak kiba pynshai ia ka pyrthei jong ngi. Ka sngi ka pynshai mynsngi mynsngi, u Bnai bad ki Khlur pat ki pynshai mynmiet mynmiet. Kine ki sharak **sa-hit-bneng**, ki long ki bathaba bad ki baitynnat haduh katta katta. Ki long kum ki mawlynnai ha ka suiñ-bneng.

Ha kane ka pyrthei-khyndew ba ngi shong mangi, don ki lum bajyrngam bad ki them baiar. Ki dieng bad ki syntiew har rukom ki taplup ia kine ki lum bad ia kine ki them. Ki syntiew ba-bun rong ki **pynsuhsieng** ia ka lyer da ka **jingiwbi** jong ki. Bad ki dieng ki sei ki soh **laiphewjait**, ki babang bad ki bathiang.

Don ki sim bun jait bad bun rong. Ki sim ki long ki nongrwai bad nongsiaw bastad. Ki nang bun ki sur **basngewthiang**.

Na kine ki lum ki kyrsói ki **umpohliew** ba-sngur bad bashngiam, kiba tuid arsut ia ki **ranablum**, bad ki noh shapoh them, kum ki kshaid kiba tuid da ka dud.

Nalor kine, don sa ki mrad laiphewjait. Don ki mrad kiba heh eh kum u Hati, bad don ki khñiang kiba rit eh kum u Dkhiew. Bun na kine ki mrad bad kynja sim ki long ki badonkam shibun ia ngi ki briew.

Haba ngi leit ñaid-kai sha lum, haba tyng-shaiñ bha ka sngi, na ki jaka kiba kham kynjang ngi lah ban peit bad ban ñohi ia ka jing-itynnat bad ia ka **jingiphuh-iphien**g ka mariang jong kane ka pyrthei ba ngi shong.

U Blei U la thaw bad U la buh ia kine kiei kiei ki baitynnat na ka bynta jong ngi ki briew.

#### KI JINGMUT :

<b>Pynsuhsieng</b>	—	pyniwbiñ bha
<b>kynjang</b>	—	ba long jrong.
<b>mariang</b>	—	kiei kiei ne ki jinglong ha ka pyrthei.



KI JINGKYLLI :

1. Aïu de ngi ïoh na ka Sngi ?
2. Balei ka lyer ka suhsieng da ka jingiwbihi ?
3. Nangno ki mih ki wah ?
4. Iano phi kham sngewbha ? Ia ki sim ne  
ia ki mrad ? Balei ?



## 2. KA JINGDUAI

Nga nguh ia Me, ko Blei,  
Ba Me la thaw ia nga;  
Me ai i pa i mei,  
Na Me nga ioh jingbha.

Nga mane ia Me, ko Blei,  
Me long u Kpa jong nga;  
Me hiar ha sla pyrthei,  
Ban ioh pynim ia nga.

Nga ieid ia Me, ko Blei,  
Namar Me ieid ia nga;  
Palat ia Me ha pyrthei,  
Ym don, nga ieid shisha.

KI JINGKYLLI :

1. Balei ngi dei ban duai ia u Blei ?
2. Kumno ngi tip ba u Blei U ieid ia ngi ?
3. Haba phi iohsngew ba ki sim ki rwai, phi tharai kumno ki iarah ia u Blei ?

### 3. KI MAWLYNNAI (I)



pyn-shong-suk	pyn-riam	pa-ra-mar-jan
ba-tip-sngi	bà-kyn-shleĩn	ba-ru-nar
pa-ra-khyn-nah	shyng-yiar	rai-toĩ
pyn-tngen	jing-sngew-sih	maw-lyn-nai

Shisien la don kawei ka khynnah kaba  
kyrteng ka Rona. Haba ka dang rit ki kmie ki

kpa jong ka ki la iap noh. Kumta ka kmie-nah jong ka, ka la ri ia ka ryngkat bad la ka khun kynthei kaba kyrteng ka Lina.

Kata ka kmie-nah ka lehbeiñ shibun ia ka Rona. Ka pyntrei jingtrei ia ka baroh shisngi; ka ai ja ia ka khlem jyntah, bad ka pynphong ruh da ki sopti jot kiba ka Lina kam treh phong shuh. Hynrei ia la ka khun pat, ka **pynshongsuk**, ka **pynriam** da ki jaiñ baitynnat bad ka ai katba ka mon.

Ki **paramarjan** ki ieid bad ki isynei ia ka Rona, namar ba ka long ka khynnah ka babha bad ka **batipsngi**, hynrei ia ka Lina baroh ki isih, namar ka long ka **bakynshleiñ** bad ka **barunar**. Ka kmie-nah jong ka Rona, ka sngewsih bad ka bitar shibun ba ki briew ki ieid ia ka Rona bad ki isih ia ka Lina.

Ha kawei ka sngi, katba ka Rona bad ka Lina ki dang ialehkai lang bad kiwei pat ki **para-khynnah**, ka kmie-nah ka la mai bad sympat ia ka Rona, bad ka la phah tong-um.

Kham pajih na iing ka Rona, don kawei ka **shyngylar** ha them. Ka Rona bad ka iam bad ka **jingsngewsih** pangnud ia la ka jinglong khunswet, ka la rah la u khiew bad ka la leit tong um nangta na shyngylar. Katba ka dang pdiang um, la wan kawei ka tymmen kaba-i-duk **raitol** bad ka la ong :

“Ai um seh khun ia nga khyndiat ngan dih.”

Ka Rona, kumta kumta hi, ka la ai; bad kata ka tymmen ka la dih haban da ngiah. Haba kata ka tymmen ka la iohi ba ka Rona ka leh sngewsih, ka la **pyntngen** ia ka bad ka la ong :

“Wat iam khun; namar phi long ka khyn-nah ka basbun bad ka batipsngi, ngan ai ia-phi kawei ka jingai sngewbha. Naduh mynta, man la ka por ba phi kren kin hap ki **maw-lyn-nai** na ka shyntur jong phi.”

Bad ka la jah noh artat.

KI JINGMUT :

**Bakynshleiñ** — ba kren bad leh shait.

**Raitoi** — baduk eh.

KI JINGKYLLI :

1. Balei ki paramarjan ki ieid ia ka Rona ?
2. Balei ka Rona ka iam ?
3. Kumno ka kmie-nah ka leh ia ka Rona ?
4. Aiu ka tymmen ka ong bad ka ai ia ka Rona ?

#### 4. KI MAWLYNNAI (II)

kyn-hied	sngew-bi-shni	myl-len
ñiang-shdod	pyn-sa-lia	ing-khong
khmih-lyn-ti	sha-ïong	jing-khong-khong
'tiew-dieng-ngai	'tiew-ku-lab	ba-phyl-la

Ka kmie-nah ka la bitar ïa ka Rona ba ka jah slem; bad haba ka la wan, ka la **kynhied** bad ka la mai ïa ka. Ka Rona ka la ïathuh sha-phang ka tymmen bad ïa kaba jia baroh. Bad katba ka nang kren, ki hap ki mawlynnai ba bun rong na ka shyntur jong ka. Ka kmie-nah ka la kyndit thret ban ïohi katta katta ki maw-kordor baphyrnai, hynrei shisyndon ka la **sngewblshni** bad atnud ïa ka Rona. Kumta, ka la pyrkhat ban phah ïa ka Lina ruh shata sha shyngyar.

Ka Lina ha kane ka por ka dang **myllen** bad sngewtynnat bha ban ïalehkai. Haba ka kmie ka khot ïa ka, ka la sdang ban khñium bad ban leh phoi. Bad haba ka kmie ka la pynbor leilei ba kan leit tong-um, ka la ïam bad ka la bitar haduh kumban lympat ia u khiew-um.

Katba ka nang pdiang um bad thnum artat ïa la ka kmie, kata ka tymmen ka la wan biang bad ka la ong :

“Phin ai um khun ia nga ban dih ?”

Ka Lina ka la phai bad ka peit ibeiñ ia ka naduh khlieh haduh kjat bad ka ong artat :

“Phet pha tymmen **ñiangshdod**, wat wan **pynsalia** ia nga.”

Nangta ka la sdang ban kren beiñ laiphew jait.

Ka tymmen ka la sneng ia ka da ki ktien jai-jai ba kan long ka khyannah ka basngewrit bad ka batipsngi, te ki briew ruh kin icid ia ka. Hynrei ka Lina ka la nang beiñ pynban, bad nang **ingkhong** shuh shuh. Ka tymmen ka la ong :

“Namar ba pha sarong bad ka shyntur jong pha ka khlei tang da ki ktien jakhlia, naduh mynta, man ka kyntien ba pha kren, kin mih na ka shyntur jong pha, ki hynroh, ki jakoid bad ki bseiñ !”

Ka kmie ka la shu ap **khmih-lynti**. Haba ka iöhi ba ka Lina ka la wan, ka la pynkloi ban leit-tan. Ka Lina pat, tang shu iöhi ia ka kmie, ka la nang sngew-ingkhong bad ka la thnum biang. Katba ka nang kren, ki mih ki hynroh, ki jakoid bad ki bseiñ. Ka kmie ka la **shaiong** ngaiñ. Ka la leit bran-bran sha ka Rona, ka la mai bad ka la sdang ban shoh ia ka.

Markumta, la wan mih kawel ka briew **baphylla** ka ba-bha-briew haduh katta-katta;

ka la **kynhied** da ka sur ka ba-eh bad ka la ong : "Wat shoh ia ka Rona; kam shym leh eiei ka basniew ba kan dawa ban shah-shoh. Dei ka khun jong pha hi kaba la pynlong kumne ialade, da ka **jingkhong-khong** jong ka. Namar ba pha lehbein eh ia kane ka khunswet, ngan sa ialam noh ban pynshong ia ka bad ki bried ki babha. Kan sa siew ia la ka bam-kadih bad ka kup-ka-sem da ki mawlynnai kiba hap na ki rymiang shyntur jong ka. Ynda ka khun jong pha ka la nang ban kren sbun, da ki ktien jemnud, ngan sa loit noh ia kato ka **jingtim** na ka. Hynrei kynmaw ba ki 'tien-bishni, ki **'tien-khong-khong** bad ki tien-sih ki long kum ki hynroh bad ki bsein ki 'tien-sbun pat, ki kham kordor ban ia ki mawlynnai bad ki kham itynnai ban ia ki 'tiew-ku-lab, bad kham iwbih ban ia ki **'tiew-diengngai.**"

KI JINGMUT :

<b>ingkhong</b>	— dom, bitar
<b>shaiong</b>	— dumbuit
<b>fiangshdod</b>	— baraikhoh bad i-dukhi
<b>myllen</b>	— pynleit jingmut ne sngewbha



**KI JINGKYLLI :**

1. La jia aïu katba ka Rona ka iäkren bad ka kmie-nah ?
2. Balei ka Lina ka iam ?
3. Ki iäkren aïu ka tymmen bad ka Lina ?
4. Ka jia aïu haba ka Lina ka iäkren bad la ka kmie ?
5. Kumno kata ka briew baphylla ka la ong ia ka kmie jong ka Lina ?

## 5. NGI DEI BAN KYNMAW

1. Ban thoh da u **dak-khraw** haba **sdang ia ka senten**.
2. Ia ka **kyrteng briew** ngi sdang da u **dak khraw**.
3. Ia **ki sngi jong ka taiew**, ia **ki sngi-iew** bad ia **ki kyrteng bnai**, ngi sdang da u **dak khraw**.
4. Ia **ki kyrteng jong ki shnong** bad **ki ri** ngi sdang da u **dak-khraw**.
5. Man la ka **lain jong ka dkhot jingrwai**, ngi sdang da u **dak-khraw**.

Ki JINGKYLLI :

1. Kiei ki kyrteng jong **ki sngi baroh shitaiew** ?
2. Kiei ki kyrteng jong **ki bnai** ?
3. Iathuh shaphang **ki shnong kiba phi tip**.

## 6. U PANDIT JAWAHARLAL NEHRU



Ja-wa-har-lal  
ba-paw-nam  
jing-lait-luid

jing-syn-shar  
pyn-shong-skul  
na-dong-sha-dong  
pyn-leh-noh-ei

**Pandit Jawaharlal Nehru** — Kane ka kyrteng bajrong ka long ka kyrteng jong u Myntri Rangbah jong ka ri India jong ngi. Ha ki tyr-peng bakhlain jong u, u kit ia ka **jingsynshar** jong ka ri baroh kawei. U long u briew u **ba-pawnam** shibun ha kane ka juk jong ngi. Baroh ka pyrthei ka tip bad ka ithuh ia u. U shong ha Delhi (Thymmai) kaba long ka nongbah jong ka ri India. Ha kine ki snem ba la lah, u

la wan poi shane sha ri Khasi-Jaiñtia ruh ban wanjngoh bad ban tip kham bniah ia kine ki ri-lum jong ngi.

U Pandit Nehru u la long u khun riewspah. U kpa jong u, u la **pynshong-skul** bha ia u shaduh Bilat. Ynda la dep ki sngi-shong-skul jong u, um shym la shongthait, hynrei u la trei shitom tynggeh na ka bynta ka **jinglailuid** jong ka ri India, na ka jingsynshar jong ki Phareng (English). Na ka bynta kane, bunsien u la shah-kem bad shah-set-phatok. La ka jingim hapoh phatok ka la long ka bashitom **nadong-shadong**, pynban um shym la **pynlehnnohei** ia kito ki sngi. Hangta hapoh phatok, u la pynleit bun ka por ha ka pule-kot bad ha kaba thoh-kot ruh de.

Haduh mynta u dang trei shitom shibun bad u la aiti ialade na ka bynta la ka ri. Mynmiet u thiah tang khyndiat kynta, bad u khie-thiah pat, la dang step. Ka jingtrei jong u, kam long tang hapoh Delhi, hynrei u dei ban leit kylleng ka ri India, wat sha ki ri nongwei ruh.

U Pandit Nehru u sngewtynnat shibun eh ia ki khynnah; bad u leh katba lah ban pynsngewbha ia ki. U don kane ka jingsngewieid wat ia ki khynnah ha ki ri nongwei ruh. Mynta dang khyndiat snem, ban pynsngewbha ia ki khynnah Japan, u la phah sngewbha ia ki, iwei i khun hati.

**KI JINGMUT :**

**Ka juk — ka por, ka pateng-bynriew.**

**KI JINGKYLLI :**

1. Uei u Pandit Nehru ?
2. Balei u la shahset-phatok ?
3. Kumno u la pynleit ia la ka por ha phatok ?

## 7. KA RI JONG NGI

<b>'per-syn-tiew</b>	<b>soh-ñiam-tra</b>	<b>kyn-toit</b>
<b>ktien-shnong</b>	<b>pa-lat-shnong</b>	<b>ba-don-nam</b>
<b>myn-hyn-dai</b>	<b>'riew-khlaiñ</b>	<b>maw-byn-na</b>
<b>pyng-ngad</b>	<b>kor-shong-thait</b>	<b>pa-ra-ri</b>

Ngi long ki Khasi. Ngi shong ha ka ri kaba kirteng ka ri Khasi-Jaintia. Ngi khot ruh ia ka, ka ri Laiphew Syiem bad ka ri Khat-ar Doloi, namar ka don bun ki Syiem bad ki Doloi. Ka ri jong ngi ka long ka ri lum.

Ka thaiñ kaba shaphang shatei ka noh pa-dun sha ki ri-thor jong ka Kamrup bad Now-gong. Bad ka thaiñ kaba shaphang shathie pat, ka noh kynsan sha ri-thor Shilot bad ka ieng beit rsung ka riatbah bajrong. Ia ki thaiñ kiba shaphang shatei, la khot ri-Bhoi, bad ia ki thaiñ shaphang shathie, la khot ri War. Kane ka **'persoh-'per-syntiew** jong ka ri, ha kaba don bun jait ki soh, khamtam u **sohñiamtra**, u sohtrun, ki kait, u soh-kynphor, u kwai bad u tymphew.

Ha kine ki thaiñ lum, thaiñ War bad thaiñ Bhoi, ki shong ki briew kiba la khot da ki kirteng bapher bapher; hynrei, baroh ki long hi



ki Khasi. La ha la ki jong ki jong ki shnong bad ki **kyntoit**, ki kren la ka jong ka rukom **ktien-shnong**, pynban haba iakren bad ki **palat-shnong**, ki kren da ka ktien Khasi.

Ka ri jong ngi ka long kaba rit; hynrei ka **badonnam** naduh ki por hyndai. **Mynhyndai** eh la don bun ki **'riewkhlañ** bashlur, bad ka jing-khañ-nar ka bakhraw. Ka don bun ki jyntei barim, kum ki mot, ki **kor-shongthait** bad ki **mawbynna**.

Ka long ka ri ka baitynnat bad ka **bapyng-ngad** shibun. Ka don bun ki lum bajrong, ki them baitynnat bad ki wah-bah kiba don bun jait ki dohkha.

Ka nongbah jong ka ri jong ngi ka long ka Shillong. Ka long ka sor ka baitynnat shibun. Ka don bun ki briew, ki Khasi bad ki nongwei; bun ki jyntei, ki surok-bah bad ki ing ki baheh. Ka Shillong ka long ruh ka nongbah jong ka Jylla Assam.

Ngi ieid ia la ka ri, bad ngi dei ruh ban ieid ia ka, namar ka long ka kmie jong ngi. Ngi ieid ia ki **para-ri** namar ngi ialong shipara. Kito kibym ieid ia la ka ri bad ia la ki para-ri, **ki** long ki nongshun jong ka.

KI JINGMUT :

**Ka thain** — ka phang.

KI JINGKYLLI :

1. Balei ngi khot ka Ri Lai-phew Syiem bad **ka** Ri Khat-ar Doloi ?
2. Ka-ei ka ri War ? Kiei ki jingthung kiba mih ha ri War ?
3. Ka ri jong ngi ka long kaba kumno ?
4. Ka-ei ka nongbah jong ka ri jong ngi ?



## 8. U NGAP




Nga ïohsngew ia ka sur sngewtynnat,  
Jong u Ngap uba her kynwung;  
N'u syntiew sh'u syntiew u kyntiap,  
Ha ka por ki kjat-sngi ki dang plung.

“Khynnah-rit, wat lyngngoh, nga kyrkieh,  
Bun jaka ngan dang leit.” u ong;  
“Sha sympa ban ïoh kit ka um-ngap,  
Na kylleng ki syntiew nga leit tong,

Sa shiphang ka prem-miet ka la poi,  
Sa shipor kan wan-lap ka Tlang;  
Te kloi kloi nga dang dei ban pynstet,  
To khublei, ban ïashait ban ïanang.”

Sa shisien u ngap u kynwung,  
U kynting, u suh wiaw, u kdat;  
‘Wung, wung, wung’ diang bad mon u her stet,  
Ka jingjop ka ïai-ap i’u basmat.

## 9. U KSEW HA SEM MASI



**ka-hait**  
**kem-ktien**

**pyn-sa-lia**  
**du-khi**

Shisien uwei u ksew ba u la samthiah eh ba shoh ka sngi, u la leit halor skum-kba bad u la dem lyter.

“Kane te ka jaka ka babit bha”, u la ong, bad u la thiah khop.

Ynda janmiet, haba ki masi ki la wan phai na lum, ki la wan beit sha u skum ban bam.

Uta u ksew u la kyndit bad u la sdang ban wiar, ban jlaw bad ban **ka-hait**; bad um shah ia kita ki masi ban bam.

“Balei kumne ?” la ong uwei u masi. “Me kwah ban bam mame ia une u skum ?”

“Shish !” la ong u ksew, “ngam ju bam skum manga.”

“Te kata,” la **kem-ktien** u masi, “lada mem bam, to shuh ngin bam mangi.”

“Em ngam shuh,” la ong u ksew. “Khie phet, wat wan **pyn-salla** ia nga ba nga sam-thiah.”

“Wa u ksew **du-khi** aïu kum une !” la ong u masi, “ban bam hi ruh um treh bam, bad ia ngi pat kiba bam ruh um shah bam !”

KI JINGMUT :

**Shoh ka sngi** — shoh thait — ba shit eh.

**Kahait** — ban thap ne kynrup kum-ban dait.

KI JINGKYLLI :

U ïakren aïu u masi bad u ksew ?

## 10. U RAJA BIRBOL

**Ba-proh-jingmut**  
**Jing-kha-wai**  
**sngew-ing-khong**

**Ia-bam-kha-wai**  
**Jing-ia-kren-kai**  
**Ba-don-nia**

U Patsha Akbar jong ka ri India, u la don bun ki briew ki bastad ha ka iing-syiem jong u. Uwei na kine, u la long u Raja Birbol. U la long u briew u **baproh-jingmut badonnia** shibun.

Ha kawei ka sngi, haba u Patsha u dang iashong-kai bad la ki myntri bad ki 'riewstad ka iing-syiem jong u, la mih ka jingkylli ha kata ka **jingiakrenkai** : kaei ka bathiang tam ha ka pyrthei. Baroh kita ki myntri bad ki 'riewstad ki la pynmih la ka jubab-jubab bad la ka nia-ka-nia. Uwei u la ong ba thiang eh ka ngap. Uwei pat u la ong ba thiang eh u pai. Uwei pat u la ong ba thiang eh ka ka shini. Uwei pat u la ong ba thiang eh ki mithai, bad kumta terter. Ynda la poi ha ka pali jong u Raja Birbol ban jubab, u Patsha u la kylli ia u : "Kumno Raja Birbol, phi pat phi ong kumno ? Kaei ka bathiang tam ha ka pyrthei ?" U Raja Birbol u la ong, "Ka bathiang tam ha ka pyrthei, te Patsha Kynrad dei ka ktien. Ha khmat jong ka ym don ngap, ym don shini, ym don mithai..." Baroh ki

myntri, ki la iarkhie ia u Raja Birbol. Hynrei ma u pat, u la sngap la ka sngap.

Hadien katto katne taiew, haba ym don ba pyrkhat shuh ia kata ka jingiakrenkai, u Raja Birbol u la khot-sngewbha ia u Patsha bad ia ki myntri baroh ba kin wan iabam sngewbha ha iing jong u. Ha kata ka sngi **jingkhawai**, u Raja Birbol u la pynkhreh bha nadong sha-dong. Ka ngap, ka shini, ka mithai, kyrhai. U Patsha bad ki myntri ki la iabam iadih sadhai hapdeng ka put-ka-tem bad ka shad-ka-kmen. Katba ki dang iasngewtynnat bha bad ki dang iarkhie sngewbha, u Raja Birbol u la mih sor bad u la leit shong ha la kamra. Ynda la poi ka por leit noh, u Patsha bad kita ki myntri ki la kwah ban ai-khublei bad ban ainguh ia u Raja Birbol, uba la pynsngewbha ia ki katta, bad uba la ai ia ki kat kata ka jingkhawai ka bakhrav kaba da ka bam-thiang bam-bang suda. Ki la phah ia u shakri ban leit khot ia u; hynrei u Raja u la phah kylla ia uta u shakri da kaba ong; "La u Patsha bad ki myntri ki leit ne ki shong ruh, ngam donkam eiei ia ki. Nga la ai ia ki ka bam-thiang bam-bang katba ki mon, bad lada ki dang kwah shuh ruh ngan ai." Haba iohsngew ia kine ki ktien, u Patsha u la bitar lep, bad ki myntri ki la **sngewingkhong**. Kumta ki la iamih noh da kaba bitar.

Dang step, u Patsha u la pynlong ka dorbar. U la phah khot ia ki myntri baroh bad ia u

Raja Birbol ruh. Haba ki la poi baroh, u Patsha u la ong : “Ko Raja Birbol, mynhynnin ka sngi me la khot sngewbha ia ngi ban **iabam-khawai** ha iing jong me; baroh ngi la iawan da kaba sngewbha hynrei haba ngin mih noh na iing jong me, balei me da kren pynjah-burom ia nga bad ia kine ki myntri jong nga ?” U Raja Birbol, u nguh ngon ia u Patsha bad u ong : “Patsha Kynrad, phi dang kynmaw ia ka jingkylli ha kato ka sngi, haba phi kylli : kaei ka bathiang tam ha ka pyrthei, bad nga jubab da kaba ong ba ka bathiang tam ha ka pyrthei dei ka ktien ? Baroh phi la iarkhie ia nga kum ia u bie, bad ki myntri jong phi ki la peit ia nga da ka jingibein. Hynnin ka sngi, nga la ai ia phi baroh ka bam-thiang bam-bang pahuh kyrhai : ka shini, ka ngap, ka mithai, ka dud bad baroh katba nga don la ka bor. Hynrei ym dei tang kato ka ktien shikyntien kaba la pynjew slam ia ka mynsiem jong phi bad kaba pynkthang ngang ia ka dohnud jong phi, haduh ba kito ki ngap, ki shini, ki mithai baroh ki kylla blad sar ?”

U Patsha u ieng joit na la ka khet, u piam ia u Raja Birbol bad u ong artat : “Kaba dei Raja, ka jubab jong phi. Ngam shym la tip ia ka jingmut bad ka jingthmu jong phi, namarkata, wat sngewsih ia ka jingbitar jong nga.”

Baroh ki la iasngewbha biang; ki la iakhublei bad u Raja Birbol; bad ka dorbar ka la wai noh da ka jingiaroh ia u Raja.

KI JINGKYLLI :

1. Uei u Raja Birbol ?
2. Balei u Raja Birbol u la pynlong ka jingkhawai ia u Patsha bad ia ki myntri ?
3. Balei u Patsha u la bitar ia u Raja Birbol —
4. Kumno u Raja Birbol u la pynjem ia ka jingbitar jong u Patsha ?

## 11. KA TELEGRAP



pa-jih	'sai-tar	khu-bor
e-lek-trik	te-le-gram	mo-tor-kar
e-ro-plen	jing-sa-wa	khyr-wait
bu-dam	A-me-ri-ka	kyn-diang

Teng-teng haba ngi leit na kawei ka shnong sha kawei pat ka shnong, ngi ju iöhi harud lynti ne halor ki lum ba don ki nar kiba la thung ter-ter kham **pajih**. Ha tdüh jong kine ki nar bajrong, don ki 'sainar ba la teh jrong ter. Ia kine ki 'sainar ki khot ki ksai telegrap ne ki **'saitar**.

Kine ki ksai telegrap ki iäid lyngba na kawei ka shnong sha kawei pat. Bad kine ki 'sainar, ki kit ia ki **khubor** ba ngi phah sha kiba ha iing ne ki lok jong ngi. Ha kine ki 'sainar, don ka **elektrik** kaba kit iä kito ki



khubor. Ia kine ki khubor ba ngi phah ki khot ka Tar ne ka **Telegram**, ka ktien kaba mut ka jingthoh ba phah na jngai.

Bunsien ngi phah ia ki khubor jong ngi, ne kino kino ki jingpyntip da ka shithi. Hynrei ka shithi ka shim por; hadien bun sngi ka shithi jong ngi ka poi na Ingdak ha kito kiba ngi phah. Namar ia kato ka shithi u kit u briew, ne ka **motor-kar**, ne ka **rel**, ne ka **eroplan**. Hynrei ka telegram ka poi tang hadien khyn-diat por ba ngi phah.

Ha ing-telegrap, don u briew uba phah ia kato ka khubor jong ngi da kaba tied tok tok ia iwei i kor-rit halor ka miej jong u. U 'saitar u kit ia kane ka **jingsawa** sha kawei pat ka iing-telegrap ha kaba don uwei pat u briew uba shim ia kata ka khubor. Hadien kane, u sa phah uwei u pion ban leit ai ia kata ka telegram, ha kito ki briew kiba ngi phah khubor.

Mynta, ki 'riewstad ki la shem kawei pat ka buit ban phah khubor khlem 'sainar. Kane ka long ka telegrap khlem 'sainar lane ka **radio**. Katto katne ki briew kiba shong ha sor ki don iwei i synduk rit. Da kaba **khyrwait** ia ki **bu-dam** kiba don ha ine i synduk, ki iohsngew ia ki **jingiathuhkhana**, ki khubor bun rukom, ki jingrwai bad ki jingput jingtem. Kumta, katba ki nang rwai ne nang put ha Bilat ne **Amerika**, ngi lah ban iohsngew **kyndiang** ha la ing la jong.

KI JINGMUT :

**eropen** — Ki lieng-suiñ

**pion** — u nongrah shithi.

KI JINGKYLLI :

1. Kumno ngi ioh telegram ?
2. Kumno ngi ioh ia ki shithi ?

## 12. U DAMON BAD U PITHIAS (D)

<b>myn-shu-wa</b>	<b>Dio-ni-sius</b>	<b>khrai-khlieh</b>
<b>Pi-thias</b>	<b>jing-ban-beiñ</b>	<b>leh-noh-ei</b>
	<b>sngew-shong-nia</b>	

Bun bun hajar snem **mynshuwa**, la don uwei u syiem uba kyrteug u **Dionisius**. U la long u briew u badom bad u ba-eh dohnud. Bunsien u ju phah **khrai-khlieh** ne phah sdienphasi ia kito kiba pyrshah ia u.

Ha kata kajuha ka por la don uwei u briew uba kyrteug u **Pithias**, uba la ju khñium bunsien ia ka jingsniew bad ka **jingbanbeiñ** jong u Dionisius. Haba u Dionisius u la iöhsngew ia kane, u la phah kem ia u Pithias bad u la rai pyniäp ia u da kaba **khrai-khlieh**.

U Pithias u la mynjur ban iäp, namar u la tip ba ka long **lehnohei** ban iäleh pyrshah ia u Dionisius. Hynrei, u la pan por katto katne sngi ban leit jngoh bad leit ai-khublei shuwa ia la ka tnga bad ia la ki khun ha shnong. U Dionisius u la shu rkhe-beiñ pynban ia u bad u la ong : "Ka jingkyrpad ka long ka **ba-sngew-shongnia** bad ka ba-dei, hynrei me tang shu lait na phatok, nga tip men ym wan phai shuh."

U Pithias u la smai hakhmat u syiem ba un ym shukor ïa u. U la kular da kaba jaw-ummat ba un wan phai shen tang shu la ïoh ban khublei bad ban kyrkhu ïa la ki khun. Hynrei u Dionisius um treh ban pyllait.

U lok jong u Pithias, uba kyr teng u Damon, um lah shah shuh ïa kane ka jingeh dohnud jong u syiem, bad u la ong : "Ko syiem, to shah ïa u Pithias ba un leit; ngan sa shong manga ha phatok ha ka jaka jong u; bad lada um wan phai ha ka ïa ba la buh, ngan sa ïap pli manga ha ka jaka jong u."

U Dionisius u la rkhe-beiñ ïa u Damon. U la phah set ïa u bad u la pyllait ïa u Pithias ban leit sha la shnong. Tang ba ha ka sngi ka balai un wan phai khlem pep.

KI JINGMUT :

**sdien phasi** — ban pynäp ïa ki briew da kaba sdien na u ryndang.

**khrai-khlieh** — ban pom na ka ryndang.

KI JINGKYLLI :

1. U-ei u Dionisius ?
2. U-ei u Damon ?
3. Kaei ka jingkyrpad jong u Pithias na u syiem ?



### 13. U DAMON BAD U PITHIAS


**paid-bah**                      **ba-lui-lui**  
**nong-khrai-khlieh**

**pyl-lait-luid**  
**shi-ryn-ïeng**

Ka sngi ka balai ka la poi hynrei u Pithias um poi satia. U syiem bad la ki myntri ki la iarkhie sngewbha ia ka jingbiej jong u Damon. Ynda la janmiet, haba ka por khrai-khlieh ka la poi, la ialam ia u Damon sha ka jaka pyniäp. Ki **paidbah** baroh ki la sngewlem ban iöhi ba u samla **baluului** bad bajem nud kum u Damon un shu iäp-ei. U Damon pat, u sngewkmen. U la kwah ba u hi un iäp ban **pyllait-luid** ia u Pithias ba un dup iöhshong ryngkat bad la ki khun.

U Dionisius u i-kmen ha la ka khet; ki paid-bah baroh ki ieng kumba lyngngoh, katba u **nong-khrai-khlieh** u la rah sha jrong ia la ka wait baphyrnai ban pynhap ha ka ryndang jong u Damon. "Sangeh ! sangeh !" la pyrta ka sur ka bajam. Ka la long ka sur jong u Pithias. U la thait haduh ba u la kylla-dur. U la jhieh da ka syep baroh **shirynieng**, bad ki jaiñ jong u ki jakhlia da ka pum-pum. Namar u la mareh jngai.

Ki nongpeitkai ki la shu iäpeit lyngngoh para-briew. Ka wait imat kumba ka shu sdien



sah ha jrong. U Damon pat, u kyntu ia u nongbat wait ban pom; hynrei u Pithias um shah. Baroh arngut ki kwah ban shah-ïap, uwei na ka bynta uwei pat. Kane ka la pynlyngngoh ia kita ki paidbah baroh ban iöhi kat kata ka jingïaieid !

U Dionisius um lah kan shuh ban iöhi kat kata ka jingïaieid. U la hiar na la ka khet, bad u la ong ha u nongkhrai-khlieh : "Pyllait noh ia ki baroh arngut." Nangta u la phai sha u Damon bad u Pithias, u la ong : "To ngin long baroh laingut ki lok ki bashisha, u Damon, u Pithias bad u Dionisius ruh de."

KI JINGKYLLI :

1. La jia aïu haba u Pithias um poi ?
2. Balei u Pithias u pyrta ban sangeh ?
3. Kumno u Dionisius u la kylla long u lok jong u Pithias bad u Damon ?

# 14. KA BAINONG JONG KA JING-KOHNGUH BAD JONG KA JINGLAMLER

<b>Nong-ia-thuh-lypa</b>	<b>Is-ra-el</b>	<b>E-li-se-us</b>
<b>Na-a-man</b>	<b>bakhraw-bor</b>	<b>Sa-ma-ria</b>
<b>sa-ñiang-thoh-lieh</b>		<b>bthah-ktien</b>
<b>Da-mas-kus</b>		<b>jing-sngew-nguh</b>
<b>Ge-ha-si</b>		<b>buh-rieh</b>

Mynhyndai la don uwei u **Nongia-thuh-lypa** badonnam jong ki khun **Israel** uba kyrteng u **Eliseus**. Ha kata kajuh ka por, la don ha ka hima Siria, uwei u rangbah shipai jong u syiem Siria, uba kyrteng u **Naaman**. U la long u brierw u **bakhraw-bor** bad u badon-burom, hynrei uba **sañiangthohlieh**.

Kawei ka samla Israel kaba ki la ringmraw ban shakri ha iing u Naaman, ka la ong : "A ! lada u kynrad jong nga un leit sha u nongia-thuh-lypa ha **Samaría**, un pynkhuid khlem pep ia u ñiangthohlieh jong u !"

U syiem Siria u la iöhsngew ba la ialap shaphang kane ka jingkren jong ka samla Israel; kumta, u la phah ia u Naaman sha u

syiem Israel. U Naaman u la leit, u da rah artat bun ki jynai sngewbha, ka ksiar, ka rupa bad bun ki jaiñkup bakordor.

Haba u Eliseus u la iöhsngew shaphang kane u la **bthah-ktien** ia u syiem Israel ban phah ia u Naaman sha u.

U Naaman u la wan bad la ki kali, ki kulai, bad u la ieng ha jynkhang ka ieng jong u Eliseus, nongiathuhlypa.

U Eliseus pat u la phah-ktien sha u Naaman ba un leit sum hynñiew sien ha ka wah Jordan, bad ka doh jong u kan sa khuid.

Uta u rangbah iapom u la bitar lep bad u la ong : “Nga la nang tharai ba un wan, un duai ia u Blei jong u, bad un pynkhuid ia u ñiang-thohlieh jong nga. Balei ngan leit sum ha wah Jordan ? Hato ki wah ha **Damaskus** kim kham bha ban ia ki um ka Israel baroh ? Ngan nang ban sum ha ki bad ban khuid ?” Kumta u la phet noh da ka jingbitar.

Te ki shakri jong u ki la wan hajan bad ki la ong : “Ko kynrad, lada uto u nongiathuhlypa u la hukum ia phi ban leh ia kano kano kaba kham khraw, phin jin da la leh, katno tam, haba u shu ong : “To sum bad phin sa khuid ?”

U Naaman u la sngew ba kata ka ktien ka la long kaba dei. Kumta, u la hiar na la ka kali,



bad u la sum hynñiew sien ha ka wah Jordan;  
bad ka doh jong u ka la wan biang bad ka la  
khuid phar.

Kumta, da ka jingkmen bakhraw bad ka  
**jingsngewnguh**, u Naaman u la leit phai biang  
sha u nongiathuhlypa, bad u la tyrwa ha u ïa  
ki jynai sngewbha bakordor, bad u la pynbor  
ïa u ban shim ïa ki, hynrei u Eliseus um treh  
bad u la phah noh ïa u da kaba suk.

U Eliseus u la don u shakri uba kyrteng  
u **Gehasi**. U Gehasi u la ikwah ïa kito ki ksar,  
ki rupa bad ki jaiñ kordor jong u Naaman kiba  
u Eliseus um shym treh shim. Kumta u la phet-  
tuh bad u la beh nadien u Naaman. Haba u  
Naaman u la ïohi ïa u, u la hiar na la ka kali  
bad u la leit tan ïa u.

U Gehasi u la pan ha ka kyrteng u Eliseus  
ïa kito ki jynai sngewbha, bad u Naaman u la  
ai pahuh ïa u.

U Gehasi u la leit phai biang sha la ïng bad  
u la **buhrieh** ïa kita ki jynai ba u la ïoh. Hynrei  
haba u la rung hapoh ïng, u Eliseus u la kylli :  
“Nangno me wan ?” U Gehasi u la jubab ba  
um shym leit shano shano ruh.

Te u Eliseus u la ong : “Me tharai ba ngam  
tip shano me la leit ? Me tharai ba ngam ïohi  
mano ba la hiar na ka kali ban wan tan ïa me ?

Namarkata kato ka jingpang 'ñiangthohlieh jong u Naaman kan bit ha me bad ha ki khunki-ksiew jong me junom."

Bad u Gehasi u la mih noh na khmat u kynrad jong u, bad u sa-ñiangthohlieh baroh **shirynieng**.

KI JINGKYLLI :

1. U-ei u Eliseus ?
2. Kumno u Naaman u la tip shaphang u Eliseus ?
3. Aïu u Eliseus u la ong ïa u Naaman ?
4. Balei u Naaman um treh ban leit sum ha wah Jordan ?
5. U-ei u Gehasi ? U la leh aïu ?

## 15. KHUBLEI BNAI



Utei u Bnai ha sahit u shong,  
Artylli ki reng ha ka khlieh u spong;  
Utei u Bnai ha sahit u shong,  
Iano u ap ban ioh-tur nyngkong ?

Shano ka tymmen dung-khaw ka phet,  
Kaba shong-dung ia u bad kaba shet ?  
Ynda u sngaid pyllun kan sa paw,  
Kan shan-duh khnuk-khnuk d'u synrei  
dung-khaw.

Baroh shisngi-shimiet kan dung,  
Haban da dor u syngkai ryngkdung;  
Un bam-shi-bam haban da raid,  
Na sahit khlem tip un shu jah-Ingaid.

Utei u Bnai ha sahit u shong,  
Artylli ki reng ha ka khlieh u spong;  
Risa, risa, thapkti, ai-khublei;  
"Khublei Bnai, ai peisa ia nga kawei !"

KI JINGMUT :

**Jah-Ingaid** — ban shu jah khlem tip

## 16. KA PEISA-TYNGKA

<b>ia-peĩ</b>	<b>shi-lyng-khot</b>	<b>kul-mar</b>
<b>mar-shi-teng</b>	<b>'Nong-lieh</b>	<b>lyng-knap</b>
<b>Nong-syn-shar</b>		<b>jing-shong-dor</b>
	<b>pyn-khap-ngiah</b>	

Mynhyndai ki briew ki ju thied jynthied da kaba shu **iapeiĩ** da ki tiar. Kim ju don tyngka ne peisa. U briew uba kwah **shilyngkhot** u nar, u **iapeiĩ** bad ka masi, ne ka blang ne u kba. Kane ka rukom iadie-ïathied ka long ka bashitom bad **kulmar** shibun. Lada ki briew ki iakut ba shibyрни u kba yn ioh kawei ka masi, bad lada u briew u kwah tang shiteng byрни, un hap pyniap ia ka masi ban iasam **mar-shiteng**.

Kham hadien pat, ki briew ki pynlong peisa tyngka da u sbai. Suki suki, ki sa mih da ki peisa tama bad kiwei ki kynja nar. Ha kane ka juk jong ngi mynta ki don ki peisa-tyngka kiba da ka tama, ka **'nonglieh** bad ka rupa. Ka tyngka rupa ka long kaba kham kordor. Don kiwei pat ki ri kiba don da ki tyngka ksiar. Ka peisa re ka tyngka ka long ka bapyllon bad **lyng-knap**. Ha kawei ka liang, ka don ka dur **nong-synshar**, ha kawei pat, ki dak kiba pyni ia ka dor bad ia ka snem.

Tang ki hima ne ki syiem kiba don la ka jong ka sorkar, ki lah ban phah shna peisa bad tyngka. Ia uno uno u briew uba shna tuh ki

kem shisyndon bad ki pynshitom. Teng teng  
ngi ju ioh kito ki peisa ne ki tyngka kiba la  
rim eh bad kibym iaid kam shuh ha kane ka  
por mynta. Kum ia kito ki khot ka **Mulot**.

Ha ri Khasi ngi don ka tyngka, ka **shipiah**,  
kaba long shiteng dor ia ka tyngka, ka shisuka,  
kaba long shiteng ia ka shipiah, ka ar-ana, ka  
shi-ana, ka shidabor ne ar-peisa, ka shi-peisa,  
ka shiteng-peisa bad ka shi-damli. Ha ka ri  
India baroh, ki pyndonkam da kine kijuh ki  
tyngka-peisa.

Don ruh ki tyngka kot kiba ngi khot ki Lut.  
Kine ki long ki sla-kot barit ha kiba la shon ia  
ka **jingshongdor** jong ki; shi-tyngka, ne san-  
tyngka ne shiphew tyngka, ne shispah tyngka  
bad kumta ter-ter. Kine ki tyngka kot ki long ki  
babit shibun. Kim khia kum ki tyngka rupa bad  
kim **pynkhapngiah** jaka ruh. Ki pynsuk shi-  
bun ia u nongleit jingleit. Tang ba ki bam-  
khñiang, ki jhieh bad ki jot kloï lada ym lah  
ban sumar bha.

KI JINGMUT :

**iapeliñ** — ban iapli.

**mulot** — ka peisa ka bym leit shuh.

KI JINGKYLLI :

1. Thoh kyrteing ia ki jait peisa baroh ba phi  
tip ?
2. Kiei ki lut ?
3. Kumno ki thied jingthied mynhyndai ?

## 17. KA 'ERĪONG

Ka lei-lieh ka khlek-khlek,  
U pyrthat u kyntraĩñ;  
U 'lap-bah u la ther,  
Nga la jhieh phar rynjaiñ.

Ka sahit ka dum tiw,  
Ba la poi ka 'erĩong;  
Baroh khoit ki phet rieh,  
La ha khlaw ne, ha shnong.

Ki tnat-dieng ki la kheiñ;  
Ki diengbah ki la ngat;  
Ki syntiew ki kyrngah,  
La ki khlieh ki dem smat.

KI JINGKYLLI :

1. Phi la ju iohi shuwa ban slap ka long kumno ?
2. Iathuh ki kyrteng jong ki lyer baroh katba phi tip. Batai artat ki long kiba kumno ?
3. Ka jia aïu haba jur eh ka lyer ?
4. Kumno ki long ki wah haba jur u slap ?

## 18. U NONGPUT 'TANGMURI (I)

**Ha-me-lin**

**ïing-shet-ja**

**lyng-ngai**

**kit-khia**

**ïa-kul-mar**

**'tang-muri**

Shisien ha kawei ka nongbah kaba kyrteŋg **Hamelin**, la don bun ki khnai. Tang ki khnai suda kat shaba leit. Ha surok ruh ki khnai, ha phyllaw ruh ki khnai, ha kamra thiah ruh ki khnai, ha **ïingshetja** ruh ki khnai. Man la ka jaka tang ki khnai. Ha ki juti bad ki jaiñ ruh ki shong ki khnai.

Kita ki khnai ki dait ïa ki briew. Ki pynïap ïa ki syiar, ïa ki ksew bad ïa ki miaw ruh. Bunsien ki dait ïa ki khmut bad ki shkor jong ki khunlung haba ki dang ïohthiah bha **lyngngai**. Ki shrut ïa ki synduk bad ki bam ïa ki khaw, ki 'riewhadem bad ki jynthung baroh.

Ki briew ha kata ka shnong ki la wad lad bun jait ban pynïap bad pynduh noh ïa kita ki khnai, hynrei kim lah satia. Baroh ka la shu long lehnohei. Imat kumba ki khnai ki nangroi nangroi pynban. Baroh shishnong ki la kynnoh pop ïa u sordar, bad ki la ong ba dei ma-u ubym **kit-khia** eiei ïa ka shnong. Te lada um lah ban pynduh noh ïa kito ki khnai, kin pynhiar sordar ïa u bad kin thung da uwei pat.

Katba ki dang iakren bad iasaid kumne, uwei u 'riew-nongwei u la wan-poi bad u la ong; "Balei phi iakulmar katne katne tang na ka bynta ki khnai ? Lada phi kulmar ban ai ia nga shi-pla ka ksiar, ngan beh lut ia kine ki khnai baroh."



U sordar u la kmen shibun; u la ong : "Lada phi lah shisha ban pynduh noh ia kine ki khnai baroh, ngi kular ban ai ia phi katba phi kwah." Ki paidbah, shynrang bad kynthai ki la iamynjur lang bad ki la ia-ong : "Haoid, haoid ngin ai ia phi katba phi pan."



Uta u 'riew-nongwei u la sei napoh pla ka-wei ka 'tangmuri bad u la put. Katba u nangput, u nang äaid artad suki suki sha ka wahbah. Hynrei katba u nangput, ki khnai ki la mih, ki la mih, ki la mih na ki thliew bad na ki kyndong baroh katba don bad ki bud äa u. Ka sur jong kata ka 'tangmuri ka la long ka-ba-sngewthiang haduh katta katta, haduh ba ki khnai ki la kiew bad la lymbub para-khnai ban poi kham hajan u nongput. Ynda ki la poi ha wah, ki äaryngkoh kulmar hapoh um bad baroh ki la äap jyllop.

KI JINGKYLLI :

1. Ka long kumno ka shnong Hamelin ?
2. Kumno ki la duh ki khnai ?

## 19. U NONGPUT 'TANGMURI (II)

**pyn-sa-lia**  
**hai-shi-hai**

**Khap-ngiah**  
**pubon**

Ki briew baroh ki la sngewbha bad ki la iakmen bym don khnai shuh kiban pynshitom ia ki. Kumta, ki la pynlong ka jingkhawai, ki la iatem iaput bad ki la iashad sngewbha. Ha kane ka por, u la wan poi u nongput 'tangmuri bad u la ong : "Nga la pyniap ia ki khnai baroh. Namarkata, kumba la iakular siew noh ia ka bainong jong nga, shipla ka ksiar."

Baroh ki la iarkhie pynban ia u. U sordar pat u la ong : "Ngin leh aiu mynta ia me ? Khie leit noh. Ngim donkam eiei ia me. Ngim don ksiar ban ai ia me. Ki khnai baroh ki la iap, te kumta kin ym wan **pynsalia** shuh ia ngi. Khie leit kat sha ba me mon."

U nongput 'tangmuri u la ong : "Phi rkhie-bein bad phi leh-bein ia nga ? Peit phin sa babe hadien ia la ka jingsarong bad ka jingshukor !" U la sei biang ia la ka jymput u la put, u la put bad u la put haduh ba ki khynnah baroh ki la bud ia u. Ka Lynti shnong ka la **khapngiah** da ki khynnah, bad shynrang bad kynthei, bad baheh bad barit; baroh khoit

ki la iabud ia u. U nang put, ki nang shad bad nang kmen **hai-shi-hai**. Ki kmie ki kpa ki pyrta bad ki khot, hynrei ka la long lehnohei. Baroh ki bud ia u nongput. Ki la kiew shalor lum bad ki la poi ha kawei ka **pubon**. Baroh ki la iarung hangta bad ki la sahkut hapoh jong ka.

Ki kmie ki kpa jong kita ki khynnah ki la sngewsih ki la iam shibun. Ki la bitar ia uta u sordar basngaid bad ki la byrngem ban pyniap noh ia u. Kumta, u la phah brieve kylleng ban wad ia uta u nongput 'tangmuri, hynrei ym don ba shem satia.

KI JINGMUT :

**pubon** — ka krem ne synrang heh.

**byrngem** — pyntieng da ki ktien ki ba-eh.

KI JINGKYLLI :

1. La jia aïu ynda ki khnai baroh ki la iap ?
2. Balei ki khynnah baroh ki la jah ?

## 20. ARTYLLI KI HAN

Artylli ki han ki jngi ha wah,  
“Kak, kak-kak, kak-kak” ki pah;  
Ki khot lem i’u ’Iar-ryngkuh,  
Uba krad jynbam hapoh lymmuu.

Thup, thup-thup, u kaweh ki thapniang,  
“Ih-ih-od,” u kynih ka sur basyiang :  
La u ryndang u khun pynjrong,  
Ki han sha um ki suh-khongpong.

“Kak, kak-kak,” sa shisien ki pah,  
U syiar u nang tharai ki la jah;  
“Ih-ih-ih-od,” u kynih kham dom,  
Shapoh um u hap da khongpong plom.

U ’Iar-ryngkuh u ieng kyrshan;  
“Ih-ih-ih-od,” u kynih jam,  
Jak baroh lai ha um ki ngam.

## 21. U MAHATMA GANDHI



Ma-hat-ma  
jing-shah-thngan  
jing-pyn-lyng-kien-snam

khraw-myn-siem  
jing-shah-jing-it  
thep-myn-siem

U PING — Ko Noken, phi iöhi kane ka long ka dur jong u **Mahatma** Gandhi.

U NOKEN — Haoid, nga iöhi bunsien, ha ki dukan bad ki iing ki briew ruh. Ha klas jong ngi ruh ka don kawei. Ki ong ba u Gandhi u long u briew uba khraw shibun.

U PING — Haoid, u long. Hynrei ka jingkhraw jong u kam long ha ka spah, ne ka bor, ne ka jingstad, ne ka jingkhlaïñ ka met, ka long ha ka mynsiem. Dei na kata ka daw keiñ ba la khot ia u, u Mahatma, kaba mut u **khraw-mynsiem**.

U NOKEN — Balei ? Nga tharai ba don kiwei kiwei pat ruh ki briew kiba ka pyrtthei ka khot ki bakhraw !

U PING — Haoid, don; bad khlem pep kin nang mih shuh lashai lashisngi.

U NOKEN — Te kumta, kawei pat ka kyr-teng jong u Gandhi ka long Mahatma ?

U PING — Em phi Noken. Kane ka ktien Mahatma ka long ka nam jong u kaba u la dawa hi ban ioh na ki khun jong ka ri India jong ngi.

U NOKEN — Te balei u la ioh ia kane ka nam, lada um shym la long u bakhraw ka spah, ne ka bor, ne ka jingstad, ne ka jingkhlaia ka met ? Nga iohsngew ba don mynta mynne ki briew kiba la ioh nam tang namar ba ki don ia kine.

U PING — Kaba dei kaba phi ong, hynrei u Mahatma Gandhi u la ioh ia kane ka nam, na ka bynta ki kam bakhraw jong u. Dei ma-u uba la trei shitom bad uba la ialeh tynggeh ban ioh biang ia ka jinglailuid jong ka ri India. Na ka bynta kane, u la len ialade bun rukom, u la pynshitom ialade da ki **jingshah-thngan** bad ki **jingshah-jingit**, khlem bam bun bun sngi, u la pynleit bun sngi ha ka jingduai; bad u la shah set-phatok ruh bunsien. Hynrei la ki jingeh bad ki jing-wit ki phrah ia ka jingthmu bad ia ka lynti jong u, pynban um shym la riej. Khyndiat-pa-khyndiat bad suki-pa-suki, u la nangtur

sha phrang; haduh ba un da jop. Ka jingjop jong u kam shym la long da ka thma-ka-wait, da ka tup-ka-man, da ka **jing-pynlyngkien-snam** hynrei da ka **jingjaijai**.

U NOKEN — Mynta nga sngewthuh. Pleng dei na kane ka daw ba la khot ruh ia u, “u Kpa jong ka Ri” ?

U PING — Haoid keiñ. U Mahatma Gandhi u ieid **thep-mynsiem** eh ia ka ri India bad ia ki para-ri baroh, ba u sngew ialade ba u long u Kpa jong ka Ri. Shisien haba uwei u **myn-der** u kylli ia u : “Kumno ki long kiba ha iing jong phi ?” U Mahatma u la jubab da kaba ong : “Ka ri India baroh kawei ka long ka iing-ka-sem jong nga.” Kine ki ktien ki pyni ia ka jingiar-jingmut jong u bad ia ka **jingkylluid-mynsiem**.

U NOKEN — Burom ia u Gandhi !

KI JINGMUT :

**Phrah** — ban ker phnieng pyngkiang da ka dieng ka siej.

**riej** — ban kynran dien na kano kano ka jingthmu ne ka kam.

**jingpynlyngkien-snam** — ka jingpyniap briew da kaba pynmih snam.

## 22. KI SHITHI

“ NOHSNCITHIANG ”

Shillong, 16-8-54.

*Ton baieid,*

*Khublei shibun eh na ka bynta ka shatri ba phi la phah ai. Nga sngewsih ba nga la kum klet ha ing jong phi, bad ban pynshitom ia phi haduh ban hap phah ai ia ka. Nga sngewnguh shibun ia ka jingsbun jong phi. Nga la sngewtynnat shibun ia kato ka jingialehkai hynnin ha ing jong phi. Nga kyrmen ba maphi ruh phin sa wankai lem sha ing jong ngi. I mei bad i pa kin sngewbha shibun, namar phi long u lok baieid jong nga.*

*Khublei sa shisien na*

*U lok baieid eh jong phi,*

*U Wenda*

KI JINGKYLLI :

1. Thoh ka shithi sha i mei jong phi pyntip ia i shaphang ka skul jong phi.



MAWKHAR

Shillong, 15 'Nailur 1954.

*Linda baieid,*

*Ka kot pule jong nga, "KI MAWLYN-  
NAI" ka la jah sla noh namar ka la kham jot. Ila  
kine ki sngi nga la leit wad sha dukan ban thied da  
kawei, hynrei ngam ioh satia namar la lut noh.  
Phin sngewbha ban ai kai ia ka jong phi? Sngew-  
bha ai ha i hep iba wan rah ia kane ka shithi ha  
phi. Ngan sa pynphai biang lashai dang step,  
hynñiew baje.*

*Khublei shibun eh na ka bynta ka  
jingsbun jong phi.*

*Kaba burom ia phi,*

**S. Brini**

KI JINGKYLLI :

1. Thoh ka shithi sha i mama jong phi : pan  
khulom bad kot thohshithi.
2. Kumno phin thoh adres ha ka enbelop ?

## 23. KA JINGDONAKOR

Burom ia la ki nonghikai,  
Da ki jingmut, ki ktien, ki kam;  
Namar ha phi ki plie ki khuiñ jingstad,  
Shaneng, shaneng ba kin ialam.

Haba ia phi ki kren ei-ei,  
Ne kylli ia ki lynnong;  
Jubab pynsuk, pynjem ka sur,  
Ia ki, to shah-shkor dngong.

Haba kylli, bad phi jubab,  
Haba ki kren ki nonghikai;  
Ieng joit na ba phi shong,  
Ka met, kadiang kamon wat phai.

Shaniah ia la ki nonghikai,  
Kohnguh ia ki, ban pynsngewbha;  
La ki kamram pyndep janai,  
Hadien habud ruh phin shem bha.

Haba donkam kaei kaei,  
La dei ha klas, ne dei habar;  
Na ki, wat pep ban pan jingbit,  
Da ong artat ka ktien "SNGEWBHA."

KI JINGMUT :

**khuiñ** — Ka jingkynshew, ka jaka kynshew.

KI JINGKYLLI :

1. Balei ngi dei ban burom ïa ki nong'hikai ?
2. Kumno ngi dei ban jubab ïa ki ?
3. Thoh ki senten ban pyndonkam ïa ka ktien  
"sngewbha."

## 24. U NONGREP

<b>shi-pyr-thei</b>	<b>iap-thngan</b>	<b>pyn-sei-soh</b>
<b>phan-mo-ngor</b>	<b>phan-ka-ro</b>	<b>phan-saw-lia</b>

U Nongrep u long u briew u badonkam eh ha ka pyrthei, ban dup pynïoh jynbam ïa ki briew. Lada ym don nongrep, ki briew baroh **shi-pyrthei** kin **iap-thngan**, namar kin shitom shibun ban ïoh jynbam. U Nongrep u dei ruh u briew uba trei shitom shibun. Haba la dei ka por-rep, ym dei tang ba u trei, hynrei u pyr-khat ruh knmno ban trei bad ban **pyn-sei-soh** bha ïa la ki jynthung-jyntep.

Hangne ha ri Khasi-Jaiñtia jong ngi, ki briew ki rep bun u **phan-mo-ngor**. Ki bam ïa-lade, bad ki kha-ï ruh sha ri thor. Don ruh kiwei pat ki jait phan ba khot ki **phan-ka-ro** bad ki phan-saw-lia. Namarba ki thiang, ki briew ki lymun bha ïa ki.

Ha ki thaiñ Bhoi bad Pnar, ki briew ki kham rep-kba, namar don bun ki hali ba la shna ha ki them jong ki lum, bad harud ki wah-bah. Da kaba dung, ne tylliat ïa u kba, ngi ïoh ïa u khaw ban shetja. Ka ja ka long ka jynbam bakongsan eh jong ngi.

Ha ki thaiñ War pat, ki briew ki rep-soh. Kiba kham kynrei eh na kine ki soh, ki long u sohñiamtra, u sohtrun bad u sohphan. Ha kine ki jaka ki rep-kwai bad rep-tympew de.

Ha ki jaka lum, ki briew ki rep ruh ïa ki kynja jhur, kynja krai bad riewhadem.

Ka kam u nongrep ka long ym tang ka badonkam, hynrei ka long ruh ka badon-burom shibun. U nongrep u long u kynrad halor lade, bad u long u briew u balaitluid ha la ka kam.

KI JINGMUT :

**lymun** — bang ban bam; sngewbha sngew-tynnat.

KI JINGKYLII :

1. Balei u nongrep u long u briew u badonkam ?
2. Kumno ngi pyndonkam ïa u phan-mongor ?
3. Kiei ki soh ba ngi ïoh na ri War ?
4. Kiei ki jhur ba ngi ïoh na ki kper ha ki jaka lum ?

## 25. KOHNGUH

“Kohnguh,” i ong i mei i pa,  
“Kohnguh, wat ju pynlah;  
“Kohnguh ko khun, phin ym bakla,  
“Kohnguh, wat la phi tieng bym lah.”

“Kohnguh,” ki ong ki nonghikai,  
‘Kohnguh, ba phin dup stad;  
“Kohnguh, khynnah, phin suk kynjai,  
“Kohnguh, wat leh, wat kren thaw lad.”

“Kohnguh” — kumta nga dei ban long—  
Ban roi ka jingtipsngi;  
Kyrdan babha ngan kiew, nyngkong,  
Ka jingkohnguh kan btin lynti.

KI JINGKYLLI :

1. Iano ngi dei ban kohnguh, bad balei ?
2. Kumno ki khot ia ki khynnah ki bym treh ban kohnguh ?
3. Shano ka jingkohnguh ka ialam ia ngi ?

## 26. KA JYLLA ASSAM

<b>ioh-sngew-lem</b>	<b>ba-i-phieng</b>	<b>koh-lyng-kai</b>
<b>shrong-syn-tiew</b>	<b>ku-ra-tia</b>	<b>'sai-na-lia</b>
<b>ba-shngiam</b>	<b>lyng-ngai</b>	<b>jing-pha-lang</b>
	<b>ba-khiah-krat</b>	

U RANG — Ko pa, pa sngewbha seh iathuh ia nga shaphang ka Jylla Assam. I 'Thei ruh i kwah ban **iohsngewlem** namar ngi dei ban thoh lashai ha skul.

I 'THEIRIT — Haoid, haoid. Iathuh seh pa, namar nga la iohsngew na ki para khynnah-skul kiba shong ha Klas III ba ki ong ba ka Jylla Assam jong ngi, ka long kaba kham itynnat eh na ki jylla baroh ha ka jinglong ka mariang jong ka.

U KPA — Nyngkong eh, ngi dei ban kynmaw ba ka **Ri-kha** jong ngi, ka long ka ri Khasi Jaiñtia. Kane ka Ri-kha jong ngi ka don ha Assam kaba long ka **Ri-shnong** jong ngi; bad ka Assam pat ka don ha India, kaba long ka **Ri-mei** jong ki nong-India baroh. Ka Assam ka long kawei na ki jylla babun jong ka ri India bakhraw. Kiba pynlong ia ka Jylla Assam, dei ki distrik kiba don ha rilum bad ha ri-thor.

U RANG — Kane ka Ri-kha jong ngi ka long kawei na kine ki distrik mo pa ?

U KPA — Haoid. La khot ia ka, ka Distrik ki lum Khasi-jaiñtia. Ka long ka. Distrik kaba kham bun briew eh ban ia kiwei kiwei ki distrik lum baroh.

I 'THEIRIT — Hangno ki don kine ki distrik ri-thor pa ?

U KPA — Ki distrik ri-thor ki don shaphang shatei jong ka jylla. Lyngba kine ki distrik ka tuid ka wah-bah Brahmaputra kaba wan tuid na Tibet, lyngba ki lum Makashang. la kane ka bynta, la khot ka Neng Assam bad ka Rum Assam.

Naduh mynhyndai eh, ka Assam ka la long ka badonnam shibun. Ki Ahom kiba la wan jop ia ka mynta la kumba hynñiew spah snem, ki ju khct ia ka, "Ka ri kaba dap da ki kper ksar." Ka don bun ki jyntei barim barim ki baitynnat bad ki **ba-iphieng** shibun. Ka don bun ki durmaw jong ki briew, ne ki **shrong-syntiew** ba la shtah bad oh ni bha ha ki maw. Ka don ruh bun ki nan ki baheh bad bajylliew ba la tih naduh ki por hyndai.

I 'THEIRIT — Sha pa, ki ong hana ba hangne ha Assam don bun ki mradkhlaw ki baheh bad ki **ba-itriem** ?

U KPA — Haoid, ka dei kumta. Don ki khla bam-briew, ki dngiem u khung u mrad uba syriem ia ka dngiem, ki hati, ki mynthna, ne ki masiprut ki **kohlyngkai**. Hynrei don ruh bun ki jait sim kiba phyrnai bun rong



bad kiba sngewtynn timer bha haba ki pah. Don u klew, ki 'iarkhiar, ki simsyiem bad kumta ter-ter. Don ruh bun ki sier bad ki jait skei. Ha ki wah-bah, kum ka Brahmaputra, don ki **kuratia** ruh, nalar bun ki 'kha bah.

U RANG — Te kiei pa, ki jingmih kiba kham kordor eh kiba mih na Assam jong ngi ?

U KPA — Ki jingmih kiba kham kongsan eh ki long kum u khaw, ki jaiñ-rusom, jaiñ-muka bad ryndia, u '**sainalia**. Don byllai ki par 'dewiong, hynrei ki par kiba kham donnam eh, dei ki par umphniang. Ha ki thaiñ ba shaphang shatei jong ka Assam, don bun ki kper-sha ki baiar ka pyngkiang bad ki bajlan ka lynter. Haman la ka kper-sha ka ba-heh, don ki ñng shna-sla-sha ha kiba ki pynih ia u sla-sha, bad ki thep ha ki synduk ban **shalan** sha kiwei pat ki ri. Ki umphniang bad u sla-sha ki long ki spah bakordor eh jong ka Assam jong ngi. U phan uba mih nangne na ri Khasi-Jaiñtia ruh u long uba la bna nam kylleng, namar u long u babha bad u **bashngiam**. Sa kawei pat kaba nga dei ban iathuh ia phi...

I 'THEIRIT — Kaei kata pa ? Iathuh iathuh seh.

U RANG — Haoid, iathuh seh pa. Baroh khoit kaba ngi la iohsngew: shaphang ka Assam ka long ka basngewtynn timer haduh katta katta.

U KPA — Ka Assam ka long ka ri ka baitynnat shibun. Ka don ki lum bad ki thor babun rong. Lada ngin ioh ban peit na jrong eh da ka eroplen, ngin iohi ba kane ka Ri-shong jong ngi, ka thiah **lyngngai** ha kjat jong ki lum Makashang kiba sop da ka ior bad tlang bad lyiur. Na kine ki lum, ki um bad ki wahduid ki ryngkoh sha ka thor Assam, bad ki hap ha ka Brahmaputra. Nangta, ngin iohi ia ki ri lum Garo, Khasi-Jaiñtia, Mikir Naga bad Lushai ba ki at bad ki them bad ki jyrngam phyrnai ha ka **jingphalang** jong ka sngi. Ka lyer ha kine ki lum ka long ka **bakhiah-krät** bad ka bapyngngad shibun. Ngin iohi ia ki 'lawbah-'lawsan, ki lyngkha bad ki kper-sha bajyrngam bad ki pynthorkba baiar. Katta shuwa, ngan sa iathuh pat.

U RANG — Katno ka jingsngewieid bad ka jingsngewphylla !

I 'THEIRIT — Ka Assam ka long shisha ka ri kaba dap da ki kper-ksiar !

KI JINGKYLLI :

1. Balei ia ka Assam la khot ka Ri kaba dap da ki Kper-ksiar ?
2. Kiei ki jingmih bakordor eh jong ka Assam ?
3. Balei ka Assam ka long ka jylla ka baitynnat ?

## 27. U SLAP

**'er-ïong-'er-ngit**  
**jing-myn-toi**  
**phuh-sam-rkhie**

**sym-boh-um**  
**phuh-syn-tlew**  
**shad-kha-lek**

Ka bneng ka la dum ngaiñ. U lyoh baiñong u per halor suiñ bad u kah-dum ïa ka Sngi. Ka la khie ka **'erïong-'erngit**. Ka pyndem ngon ïa ki kliar jong ki dieng-bah. Ka kdiah ïa ki tnat jong ki. Ki sladieng ki hap ha madan, bad ki bch kylleng kat sha ba ka lam ka lyer.

Ki blang, ki masi kiba bam-phlang ha ki ranablum-bajyrngam, bad kiba dem sngew-bha ha ki **'dewlang-ni**, ki phet pynkloi ban leit rieh ha ki synrang. Ki sim ki sangeh la ki jing-rwai. Ki kaweh pynstet ïa la ki thapniang ban her sha la ki skum.

Ka leilieh ka 'ba. U pyrthat u kyrhuh. U ther u 'lapbah-lapsan. Ka la slap.

U slap u long ki **symbolh-um** kiba hap na suiñ. U long ka **jingmyntoi** ka bakhraw ïa ka pyrthei baroh kawei. Ka khyndew kaba la tyr-khong bad la pdang na ka jingthang ka sngi, tang shu la ïoh slap ka tngen jai. Ki lyngkha ki jyrngam bad ki umpohliew ki kyrsoi. U slap u pyntngen shibun ïa ka bneng. U sait khuid

ia ka lyer, bad u wanlam ia ka jingkoit jingkhiah.

Ki jingthung baroh ki plong bha bad ki san. Ki diengsoh ki **phuh-syntiew** bad ki sei la ki soh bun rukom. Ki syntiew ki päar la ki sla, bad ki pyni la ki rong phyrnai bunjait. Ka lyer ka suhsieng da ka jingiwbihi jong ki.

Tang rang pat, ka Sngi ka tyngshaiñ khlek. Ka mariang ka **phuh-samrkhie**, ki tnat-dieng bajyrngam bad byrtem-byriong, ki **shad-khalek** ha ki lyer pyngngad.

KI JINGMUT :

- 'dew-langni** — Ki jakǎ phlang bajyrngam.  
**synrang** — Ki krem hapoh ki mawsiang.  
**plung** — Ban san bad khie-lung bha.

KI JINGKYLLI :

1. Kumno ka long ka bneng shuwa ban slap ?  
2. Balei ba donkam ia u slap ?  
3. Long kumno tang shu rang u slap ?

## 28. I MEI

Hapdeng ki maw, ki shiah i phuh,  
I 'Tiew-lyngksiar barit;  
I wiat samrkhie marwei khlem tlor,  
La jingsngewsih ki wit.

Ki jingiwbih i **pynpathai**,  
Pynsieng dohnud jong nga;  
Ki rong thaba ka khmat jong I,  
Ia nga ki pynsngewbha.

Bad sngi bad miet ia nga i ap,  
Ba ngan dup san rangbah;  
Naduh ba ngam pat nang ban iaid,  
Ia nga ithum i bah.

Haba nga thngan, nga ur, nga pang,  
I sieng iwbih bathiang;  
Haba ki jingkluslai ki ban,  
Dohnud i **pyntyrsiang**.

Hangno syntiew kordor ngan shent,  
Tyllup ka snieh pyrthei ?  
Ita i 'Tiew-lyngksiar iwbih,  
Jong nga i dei i **Mei**.

KI JINGMUT :

**pynpathai** — pynsieng iwbih.

**pyntyrsiang** — pyntngen.

KI JINGKYLLI :

1. Don katno jait ki 'tiew-lyngksiar ?
2. Balei ngi itynnat ia ki syntiew ?
3. Balei ngi dei ban ieid ia la i kmie ?
4. Aïu ngi dei ban leh ban pyni ba ngi ieid  
ia i ?

## 29. U NONGTHOHDIE

### BAD U SDIE

<b>pyn-ngat-dieng</b>		<b>sdie</b>	<b>sloit</b>
<b>byn-ñlaw</b>	<b>nu-sip</b>	<b>'lei-um</b>	<b>duh-ei</b>
<b>khwan</b>	<b>thyl-li</b>	<b>nong-thoh-dieng</b>	

Mynhyndai eh uwei u nongbylla u **pynngat-dieng** harud kawei ka wah-bah. Katba u dang pom, u **sdie** u la **sloit** bad u la sied shapoh thwei. U nongbylla bapli u la shu shong sngew-sih, namar u la long u baduk. U la **bynñlaw** shi-bun eh ia la ka **nusip** basniew. Bad u la shu peit pyrkhath ia kata ka thwei.

Kyndit kyndit, u iohi pynban ia u **'lei-um** ba u mih nangta napoh thwei. Uta u blei u la kylli ia u balei ba u shong pyrkhath sngewsih hangta harud um. U nongbylla u la iathuh ia la ka jingsniew-bok ba ngam noh u sdie hapoh um. Uta u blei u la ngam biang hapoh thwei bad u la wan rah da u sdie ksiar. "Dei une?" u la kylli. "Em phi kynrad, um dei," la jubab u **nongpynngat-dieng**. U blei u la ngam biang bad u la wan rah da u sdie rupa. "Une u sdie jong phi?" u la kylli. "Uto ruh um dei phi kynrad," la ong u briew. U blei u la ngam biang sa shi-

sien, bad u la wan rah ia u sdie jong u briew. Uta u nongbylla u la phuh-samrkhie bad u la ong: "Haoid, haoid, uto te imat dei u jong nga."

Uta u 'lei-um u la sngewbha shibun ia ka jinghok jong uta u **nongthohdieng**. U la ong: "Namar ba me la kren hok, ngan ai ia me ym tang une u sdie nar, hynrei ngan **ai-ei** ia me une u sdie ksiar bad u sdie rupa ruh."

U nongthohdieng u la kmen ia la ka jingbhabok, bad u la leit noh sha shnong. Baroh ki paramarjan ki la sngewlyngngoh bad sngewkmen lem ia ka jingbha **nusip** jong u.

Uwei pat u briew, ynda u la iöhsngew ia kane ka jingjia, u la leit shata sharud um, bad u la bret hapoh thwei ia la u sdie. U la shong hangta harud wah, bad u la leh **mynleh** sngewsih. U blei um u la mih bad u la kylli ia ka daw ba u sngewsih. U briew u la iathuh ba u sdie jong u, u la hap noh hapoh thwei. Uta u 'lei-um u la ngam jak bad u la wan rah da u sdie ksiar. "Une u sdie jong me?" u la kylli "Haoid, haoid, uto u sdie jong nga. Wow! nga la jan **duh-ei**!" Uta u blei u la bitar ia uta u thok uba **khwan**, u la ngam noh shapoh thwei, rangkat bad u sdie.

Uta u briew u la shu leit phai **thylli** sha la ing. U la duh-ei wat ia la u sdie nar la jong ruh.



Haba u la poi ha ïng, ka tnga jong u ka la kylli : “Me ïoh ?” Ma-u pat u la ong : “Ka jingthok bad ka jingkhwan-lalot ki pynjot bad pynjah burom.

KI JINGMUT :

**Bynñlaw** — ud sngewsih.

KI JINGKYLLI :

1. Balei u 'lei-um u mih napoh thwei ?  
Katno sien u mih bad katno tylli ki sdie u rah ?
2. La jia aïu haba u nongthohdieng banyng-kong u poi ha shnong ?

### 30. KO RI BAIEID

Ko Ri baieid jong nga,  
Ko Ri shongkun thaba;  
Ko Ri iphuh iphieng,  
Ko Ri iwbiw suhsieng,

Ko Ri ba seng ki longshuwa

Hangno ngan shem kum Pha,  
Wat la nga wad shiryta !  
Kylleng ka sla-pyrthei,  
Ngam shem ha-ei ha-ei.

Ko Ri bathiang i mei-i-pa !

Kyrteng jong Pha ka thieng,  
Ko Mei iphieng kynshriang ?  
Ka khmat bha-briew jong Pha,  
Ngam ngiah peit shiryta.

Ko Ri jong nga i-ieid kyndiang !

Ko Ri baieid jong nga,  
Ba seng ki Longshuwa;  
Ko Ri bathiang jong nga,  
Ba kdup i'i mei-i-pa.


Ha Pha ngan iap ngan im shiryta.

KI JINGMUT :

**shongkun** — i-khraw barom; i-khia jinglong

**iphieng** — itynnat bad i-khraw.

**suh-sieng** — bajur ka jingiwbiw iwthiang.





**PRICE : Rs. 15.00**